



謝臯羽  
詩集序

謝臯羽  
詩集序

謝臯羽  
詩集序

謝臯羽  
詩集序

謝臯羽  
詩集序

謝臯羽  
詩集序

每過嚴陵釣臺下  
指白雲源荒址  
輒歎歎

隕涕曰有宋遺民  
謝臯羽哭文信公  
聲聞

千秋是其所棲  
魄處臯羽生長溪  
就室吾

杭築廬西湖上  
往還桐江尋汐社  
為西臺

之哭竟卒於杭  
返葬雲源予誌武  
林文獻

擬收之流寓嘗愛其晞髮集以爲能洗宋  
人習氣不自意試宰長溪亟訪臯羽故蹟  
得友人徐興公所訂繆氏本重爲參核屬  
郭生鳴琳布之夫誦詩讀書要在論世當  
信公集師海上臯羽散貲募客杖策以從  
公死麻衣繩履獐狸山澤間所觸輒哭過

蘇臺竟夕哭走探禹穴北鄉哭登蛟門候  
潮山感乘桴則又哭游浦陽仙華巖酒酣  
望天末慟哭過宋故宮悲吟伏地哭而莫  
著于西臺之哭荒亭踞酌以竹如意擊石  
歌招魂山水哀鳴竹石俱碎斯豈問桃秦  
源採芝南山以洩孤憤也者夫亦博浪無

序一  
惟江流無楫聊寄迹羊裘釣竿之區以冀  
宗國之有中興而夢客星乎哭之聲長而  
旨遠其詩曰殘年哭知己白日下荒臺淚  
落吳江水隨潮到海迴故衣猶染碧后土  
不憐才未老山中客惟應賦八哀又云西  
臺憶故人野祭忽如夢仰視浮雲馳不覺

哭之慟又云落日失滄海寒風上薊門雨  
青餘化血林黑見歸魂蓋無論西臺有記  
故宮有詠冬青有引古釵有嘆卽鏡歌之  
述祖德琴操之哀江南長謳短唱皆哭音  
也讀之如野鶴唳秋嶺猿嘯夜颯颯乎牢  
騷侘傺之響宛成楚聲故亦託興遠遊以

三

晞髮自命說者以其詩方長吉郊島夫郊  
島有其質而無其調長吉有其調而無其  
情勿謂宋詩盡遜唐也文多山記亦自憫  
惓澹黯蓋高季迪吊之云所哭豈窮途中  
抱千古冤悲夫貞女崩城貞士懷都哭有  
二哉南渡後長溪科目遞盛如隆興乾道

寶慶淳祐間每榜四五人寶祐至六人卽  
信公榜亦至五人然姓字人無問者而貧  
布衣獨以一哭不朽千古乃擔圭結綬能  
爲貧布衣之哭者幾夫臯羽未沾寸祿顧  
能爲哭擔圭結綬能爲笑不能爲哭嘻嘻  
旣平泄泄方蹶笑之屬也而不能哭不惟

不能哭又笑能哭者悲哉悲哉或謂秦寧  
烏乎哭諸曰賈長沙不痛哭厝薪乎哭於  
治爲長沙哭於亂爲長溪治形而亂實能  
爲哭者幾夫必有哭之氣骨而後秦寧可  
勦板蕩可勦卽信公正氣歌所稱子房椎  
蘇武節侍中血睢陽齒常山舌與臯羽哭

音千秋答響悲哉乎是以論其世也與公  
郭生倘亦有意乎其人而寄慕焉也吳光  
卿緝學志爲臯羽表微復纂弁言雅徵同  
好先訂是集者爲穆洋繆孝廉一鳳有詩  
曰可憐當日西臺淚併作桐江日夜流且  
稱臯羽爲同里樟南坂人蓋於是集亦有

標識功第尚多譌漉與公蒐覈補苴不遺  
餘力郭生分讐乃始正云

萬曆戊午禊日長溪令武林張蔚然書



謝臯羽集序

有宋出迪遺士臯羽翺長溪產也遷于浦  
城卒于虎林其氣憤然塞于濁世其書一  
車殉乎名山踰髮集其一耳且幾殺青矣  
慕其行者因嗜其言賞其音者益重其品  
語小謂樂府諸體似李賀張籍近體出入

郊島古文則直溯柳柳州語大謂其悲文  
山爲悲宋思子陵爲思光武深有契于麟  
經內夏外夷之意予因而折衷之臯羽詩  
不必規規較其聲響比其色澤而醜豪發  
恠穿天出月真堪與三閭大夫上下千載  
間長吉輩不足班也長溪郭時鏘紹聞德

言雅尚文獻得徐興公所訂晞髮集復請  
正于張令公萬軸一斑遂成善本梓之以  
傳欲予序意予以前人之論讚備矣反復  
擊節得其可風者三焉夫俗競刀錐借鋤  
德色而臯羽慕義散貨計不旋踵破除慳  
恠一也世態交游好朝惡暮與市道無別



臯羽一嫁文山終身不貳效華周杞梁之  
妻之哭死生見情二也世人作文章依傍  
門逕不能卓拔愈近愈卑臯羽瞑目遐思  
直追曠邈隔絕流俗三也臯羽所生之鄉  
重嶺疊嶂令人喘息得此中竒異者其人  
其言與其山其水爭妍絜峻皆爲天壤間

所不可無之物后之寓目于斯者低回嘆  
賞竝稱靈傑洵不虛耳乃有以三者之俗  
嘲長溪寧知山川無恙風韻依然觀于時  
鏘亦足爲長溪解嘲矣或曰臯羽閩人也  
屬所知題其所曰粵謝翺墓豈閩粵之稱  
本之班史耶予曰雖然臯羽隨文山入粵

文山潮陽五坡之難臯羽匿潮邑民間倉  
皇一訣燕越九原臯羽之不忘于粵可知  
也陵谷有遷墓石不轉可哭可歌可閩可  
粵方死方生非人非鬼孤憤竒衷百代誰  
測故讀臯羽集者更當得于語言文字之  
外可也

萬曆戊午上巳日潮海吳仕訓光卿序



謝臯羽晞髮集序

宋社旣屋忠臣義士感憤激烈之氣徃徃  
發于詞章而不可遏毋論委質爲臣如文  
山登山者其所著作一本於忠君報國之  
忱卽落魄布衣丁流離困苦之際而牢慙  
不平之念每寫之於詩歌文字間吾鄉於

宋遺民得兩先生焉一爲長溪謝翱臯羽  
一爲連江鄭所南思肖臯羽爲文丞相客  
當丞相被執以死晝夜哭不絕聲思肖更  
名不忘趙乃誓不與北人交接託畫楚蘭  
以見志臯羽僑居睦州思肖流寓吳市其  
所託跡畧同而其所爲詩歌亦峭峻相似

思肖有錦錢集歲久軼弗傳獨臯羽晞髮  
集行于世脩詞之士喜誦之尤爲楊用脩  
太史所稱賞先後數集編次紊亂魚魯不  
一虎林張維誠先生來令福安正臯羽所  
生之地下車首徵文獻郭君時鏘乃取予  
所訂晞髮集以進維誠先生復加考核梓

而傳之予惟古今不事二姓悲憤亡國卓  
行高節足爲百世師者無如漢之陳咸晉  
之陶潛咸見何武鮑宣死卽日乞歸新莽  
墓位猶用漢家祖臘潛知宋業漸盛飄然  
棄五斗以去所爲文章永初以後惟書甲  
子其用意固深且遠矣臯羽牢慙不平之

念賦楚歌而哀號擊如意而伏醢譚勝國  
事輒悲鳴煩促涕泗交睫嗚呼哭丞相者  
其哭宋社乎擊如意者其擊強胡乎視漢  
之咸晉之潛卓行高節誠無軒輊張令君  
之惓惓于斯集也毋亦忠義之所激耶若  
夫思肖之遺言可與臯羽凌駕予求之四

方二十年而不能得或有發名山之藏出  
帳中之秘予將稽首而受之庶知吾閩宋  
有兩義士皆以詩稱者也

萬曆戊午孟春晉安後學徐勳與公撰



謝臯羽晞髮集序

漢藝文志有地形書楚威王以金陵有王  
氣地固有形有氣哉子夏曰堅土之人剛  
弱土之人柔此形氣之說也詩曰維嶽降  
神生甫及申則又有神焉神之降乃生疇  
人形氣不得而圍之矣福安爲閩邊邑其

土風儒雅好修形氣然也而環邑皆山層  
標杳嶂竒拔天表倘所謂含澤布氣以調  
五神者非乎唐神龍初降其神爲薛令之  
以文學德行破闕天荒其後五百餘年復  
降爲謝臯羽倜儻朗節不負文文山其詩  
文則直禰令之盡洩辰山天柱之氣文筆

鳳渚之秀此二公者殆邑之畸人崇嶽之  
所吐符者也顧令之幸而際唐中葉無以  
表見大節但以廉見知名垂後世臯羽不  
幸而當宋鼎方移憤惋激烈有足悲者焉  
臯羽著書百餘卷皆以殉葬獨有晞髮集  
稍傳於世我弘治間海陵儲少卿壘得建

序四  
安楊晉叔抄本於是馮御史允中刻於海  
陵嘉隆間程文學煦凌廉訪瑄重刻於睦  
州新安萬曆初邑人繆令君一鳳復刻於  
其邑刻者數本至休暢矣然各有帝虎之  
訛讀者病焉邑大夫張公維誠武林大儒  
也以臯羽嘗居西湖與之合志於異代乃

取予友徐與公所訂善本擇諸生之樹義  
者郭君時鏘屬以重梓貽惠後學予嘗著  
東越文苑至今之明月集憫其弗傳所傳  
東宮題壁一詩又作寒酸語不見其所長  
令之於國則幸無臯羽之遭臯羽於身則  
幸逾令之有千載知已張公治福安行厨



之甌何異萊蕪乃尚友千古折節下賢不  
晞臯羽之髮而握周旦之髮所得不已奢  
乎此刻成韓陽諸山隱隱復有佳氣矣萬  
曆戊午孟夏朔候官後學陳鳴鶴撰



晞髮集序

余少小弄韻語即喜誦謝臯羽詩輒大叫  
稱佳已而得繆下陽公所刻卒業之然不  
無西河三豕之訝已而郭時鏘再校鏗以  
行則武林張維誠三山徐興公所訂善本  
也戊午秋余刺棹入韓陽訪張令公客時

序  
鏘齋頭相與探討今古隨意抽度上帙日  
翻閱一過每朗誦罷呼童浮一大白賞之  
庶幾簷花砌草淡月微颺之餘恍忽若見  
謝遺民僊七歸來因賦短章一律以寄憑  
吊焉嗟夫先生生於吾長溪而展跡蒲四  
方或於鐔津或於建浦或於婺水於臨安

其從信國也又或於漳泉於粵洲五坡間  
而結局埋玉則在釣臺白雲之壑即使死  
者有知其遊魂森宥何處可招而千載而  
下徒想先生之哭聲謂其歔歔知己一腔  
熱血直爲文山傾灑嘻亦甚矣當先生散  
貨赴難伏劒入信國之門是時信國已東

西竄落計畫半無復之先生廁身參軍記  
曹中碌匕溷鷄羣不聞其用一謀試一策  
而終信國之身未嘗片語及先生姓名者  
其國士衆人之報稱受恩之淺深可知也  
不識先生此二點淚胡爲乎來哉卽不然  
信公稍匕引重未幾散去遂以爲不世之

遇激烈號呼以從之亦不過田橫島上七  
十客之流小丈夫行徑耳余謂宋季之秋  
不周山崩四維盡圻茫二宇宙爲向來正  
心誠意悞成奇變到末僅一文丞相以握  
觚書生憑其義膽奮不顧身纍二然如一  
木之支大厦先生已偷眼拊心久矣一朝

月五  
挾策勤王相將發憤其爲天下雄豈區區  
備記曹落人後者至大事既去骨志流離  
猶四顧低回屬意再舉如咏冬青樹云願  
君此心無所移此樹終有開花時又豈須  
史忘宋哉其自願效太史公著季漢月表  
如秦漢之際後人必有知予心者嗟後

卽有知先生知其哭丞相也耳秦楚之際  
誰爲馬上翁誰爲留候天不祚宋何必生  
渠悲夫故愚以爲哭魯公哭開府皆寓言  
也又曰阮步兵死後空山無哭聲壯哉斯  
言大丈夫用則爲廟不用則爲鼠不大笑  
則大哭總以發舒英雄之氣而已想當日


序五  
四  
慟哭西臺數斗之泪撼林之聲此時眼光  
雙白作何面孔非惟不知邏舟且不知有  
同輩傍觀併不知有人間世意蓋私許牟  
表老子知吾心下此白雲隱君亦未易測  
識耳夫天下已定則子陵抗不仕之高天  
下已亡則先生洒不歎之淚治亂不同英

雄之賡志則一此惟富春一片石差可與  
對語而說者以爲慕嚴光清隱亦非也今  
讀其鏡歌騎吹諸曲追慨宗國盛時真可  
驅風鞭電及種二詩文皆有吞吐世界之  
魄千百歲其言若新而史稱所著編目尚  
多轉恨方鳳輩名爲莫逆迺盡殉之殘煙

蔓草中與其骨俱朽安所稱知心者雖然  
猶有斯集在使人誦西臺冬青之篇知空  
山哭聲錢塘靈氣常存天地間不亦幸乎  
大抵吾斗大長溪其山川礫礫多奇其人  
徃二有俠烈豪爽之氣不可磨滅先生信  
地靈所鍾且天忠憤照耀今昔尚矣後此

數百年復有傾軋捍賊如郭君大科者竟  
以死難祀其志行畧相埒豈慕先生而起  
也與抑亦山川所侘值也郭君者時鏘大  
父蓋嘗向余嗚咽述其事云

萬曆戊午九日郡人崔世召徵仲父書於  
東臯草堂



晞髮集彙序

晞髮集序



晞髮集有宋遺民謝翱臯羽所著翱之出處志  
 行其友方鳳吳謙有狀有志太史宋公暨諸先  
 輩有傳翱書始百卷此集蓋其一也維宋以仁  
 厚立國以禮誼恭讓遇士大夫比其亡也又值  
 夷元猾夏而有之故食焉仕于朝者徃徃死其  
 封疆社稷以就夫義命之所安而丞相文公尤  
 光明俊偉震動一世迄收宋三百年養士之效

至于儒碩豪傑之士窮處于家者耻淪于夷以  
毀冠裂裳爲懼則相率避匿山谷間服宋衣冠  
以終其身而翱則丞相曾署以職者計其時所  
以處成敗利鈍死生去就者諮謀已定及丞相  
死于燕翱徬徨山澤長往不返懷賢憤世鬱幽  
之氣一吐于詞卒窮以死視一時督府相從之  
士等死耳翱眞丞相之客也蓋其君臣之所感  
召師友之所切劘故底于成就者如此嗚呼是  
豈一日而然哉此集囿抄于建安楊晉叔會馮

御史執之按部至海陵囿出而閱之作而嘆曰  
翱之樂府諸體似李賀張籍近體出入郊島間  
古文則直溯柳柳州之派其志潔其行廉有沉  
湘蹈海之風是宜傳也同時之士泯焉不傳者  
多矣翱獨賴是集之存傳翱可以想見其餘其  
不傳者亦或有殘編斷簡流落人間者乎將又  
因之以傳也乃篋之至揚告唐運使文載運使  
曰此予雅慕其人而未見其文者遂相與刻之  
而屬囿爲之引弘治十四年太僕寺少卿海陵



儲懽撰

曰此晞髮集序

予按部至海陵儲少卿靜夫出示晞髮集一帙  
乃宋逸士謝翱臯羽所著余三復之愛其詩文  
竒古可法且悲臯羽之志節將泯然不白于世  
也遂篋付唐運使文載校而刻之夫君子嗜義  
而殞身小人貪得而苟免使俱一時澌盡則來  
者何所勸懲哉翱一布衣而樹立偉然尤不可  
得後人所當亟以表章者嗚乎臯羽豈但文詞

之工哉讀是集者尚論其世可也弘治十四年

監察御史柳陽馮允中撰

晞髮集序

韓子云大凡物不得其平則鳴而况忠義之在  
人心有所未遂不能不形于詩歌吐爲文詞以  
洩其憂思沉鬱之氣是氣也胡爲而然也蓋天  
地之正氣不待生而存不隨死而亡不以成敗  
利鈍而有間也姑以宋事論之得是氣而成有  
宋之偉績韓范富歐是也得是氣而圖宋室于

既亡文山臯羽是也其成敗利鈍雖殊其氣之  
掀揭宇宙流行今古則一也三代之後宋以忠  
厚立國而培養扶植漸涵浸漬至有遺民不盡  
如臯羽者夫豈偶然哉觀其杖策歸文其生也  
有所爲依附子陵其死也有所歸天若祚宋其  
所樹立當不在韓范富歐下矣昔人謂桐江一  
絲扶漢九鼎然則臯羽招魂之歌至今讀之猶  
有生氣豈不足扶宋于千百世之後哉予仕睦  
將三年而于臯羽未嘗一日忘也乃復尋舊址

廓而新之人始知有臯羽之墓又得晞髮集讀  
之慷慨激發不下楚詞雖出于憂思沉鬱之餘  
要之不失乎性情之正然後知耿光遺烈猶有  
存焉而感發興起不有待于斯乎嘉靖乙卯新  
安玉泉吳勳撰

晞髮集序

敘曰古稱燕趙多忼慨之士鄒魯產守節之儒  
若臯羽者可謂兼之矣昔靈均被放睠懷于君  
不能自己而醜惡害正實繁有徒于是有緹馬

閨風濯髮洎盤之懷阮籍之時奸宄得志佗倅  
債悶途窮乃號觀其咏懷之什殆摭其蘊而非  
徒爲兒女無益之悲臯羽于宋未嘗沾人之祿  
僅客文山而止耳乃懷靈均之思慟阮生之哭  
是遵何說也蓋君臣之義不可解于心夷夏易  
位今古之大變時旣無要離聶政以奮祖龍之  
一擊又不能得漸離之筑報荆卿于冥漠之間  
西臺之歌與楚招不謀而相符其酸楚激烈可  
泣鬼神而悽入肺腑擊節而歌也異處仲之所

存晞髮而遨也匪蛟螭之故作過期而哀也雖  
有破山注海之狀而悲恐失其所依銑吹古選  
近體雜著之作足以闡昭大宋之英聲而凜雪  
胡元之塵垢抑鬱之氣于是乎伸忠義之懷于  
是乎在可謂驂元而駕柳追屈而配阮矣一時  
同志之士皆振衣千仞濯足清流自樹瓌瑋九  
死不變宋室養士之報因之以彰鄒魯之風不  
得獨擅于前矣然宋室旣亡之後有合尊生子  
之謠雖正史所未備揆之天道要亦未必爲無

稽使臯羽有知忼慨不平之懷或可少慰于千古云嘉靖乙卯新安王景象啓明撰

### 晞髮集序

晞髮集六卷乃宋謝公翺臯羽所著公集殆百卷此獨存其關於忠義大節者耳嘗攷宋遺民錄讀公西臺招魂之詞可謂有忼慷悲歌之風及覽楊升菴詩話稱公著作乃宋季詞人之冠以未獲見爲歎偶與玉泉吳子談及推睦時首荆公之祠墓因示予以碑刻重以是編夙懷良

慰如獲大弓遂命梓人與秉彝好德者共焉嘉靖乙卯新安程煦撰

### 晞髮集序

昔者聖人之作春秋其所爲凜凜于一字之微以責備乎當時之后王君公者莫大乎華夷之辨蓋人紀所由植立而萬世之治忽所關也故曰春秋謹嚴嗚呼孰知千百世之後有蒙古之亂乎夫宋之先非無朱邪石晉拓拔之分治也非無五胡之擾攘也然中國之統猶存譬之雲

霧薄蝕雖逾時累夕日月之光無恙焉宋亡則  
正統盡矣堯舜禹湯文武之傳絕矣以故忠臣  
義士生丁其時者其激烈憤惋獨異乎他時非  
道之異時使然也何則夏亡而殷興周亡而漢  
興唐亡而宋興雖革命易姓不失爲中國惟時  
士大夫持不事二君之志則有甘心巖壑而已  
乃若乾坤易位日月異行九服之內均爲左袵  
使夫子生斯時其書法當何如耶謝臯羽先生  
家浦城德祐之季從文丞相勤王軍敗脫身走

浙江懷留侯鄧禹之志非其時匿民間以死其  
所爲晞髮集大抵以楚聲發其不得之志而浩  
然之氣如白虹貫日予得而讀之涕泗交頤直  
欲起先生于九原以觀今日中國之盛而無從  
也嗚乎悲哉旣與郡守邵君議以克合祠之于  
翊正祠矣又出其集而梓之因爲之序以發明  
春秋之義邵君名廉南豐人以給事中知郡事  
方以文章氣節名一時其爲郡加意教化故以  
是託重焉隆慶六年徽歙斗城凌瑄撰

晞髮集序

莊子曰君臣之義無所逃于天地之間若宋遺  
民謝臯羽氏者以匹庶從軍起閩粵宋亡流離  
閔匿吳越嚴婺間真若無所逃者乃其憤悶幽  
潛嘯曼瓊琚歌總金石歸乎風韻允矣天稟不  
啻分義無所逃也夫天地有正氣有竒氣風霆  
雷電氣竒而正山峙川流氣正而竒其得之人  
爲節義爲文章渾然氣同也臯羽當其時陰陽  
錯置元氣反覆何世可逃秦源無桃南山無芝

何地可逃赤狐黑鳥上矰下罟何人可逃乃劬  
劬草草詘獲誰憐投虎自衛寧齒無舌寧萬無  
規寧鹿無馬寧龜無犧博浪袖鐵荆卿七首異  
得一當無所資地晚乃慟哭嚴陵委菟白雲而  
其寒產悲酸耿介慷慨遇風日晴陰欽岑巖菽  
草木禽獸輒寄胸臆若將逃于詩者作西臺記  
許劌錄晞髮集所自命也嗟夫宗周遷而黍離  
存荆楚亡而離騷在豈非正氣竒氣天地不磨  
滅哉乃臯羽旣棄當世世亦無復知臯羽者其

知者以爲哀文山慕子陵爲得所託耳嗟嗟悲  
文山悲宋也思子陵思光武也燕啄龍種中興  
眞主者誰客星者誰袖鐵伊何七首焉托孤臣  
萬死不得于今或異于後倘有大有爲之君如  
南陽眞主不召之臣如嚴陵卽一杯尺牘比補  
天五石絳水九鼎矣西臺許劔陽阿晞髮精斯  
在也或者過靈均之忠類橫客之俠卽商周明  
聖應會天人首陽採薇尚父何以稱義子孟氏曷  
云清聖也况臯羽所邁不帝商周星淵哉今廉

訪凌公明春秋華夷之辨聖世治教之隆覆瓿  
玄草後有子雲高山流水孰無鍾期哉百年臯  
羽公爲知心矣公以勲德名世知言養氣良由  
素衷廉愚眇輒書末簡愧不能贊云隆慶壬申  
南豐邵廉撰

晞髮集序

予少時聞諸鄉之故老猶能傳臯羽事里之樟  
南坂昔爲謝氏居故址猶存今田莽矣宋季有  
謝鑰氏爲予遠祖仲山公之壻以春秋學見重

其子翱有文章名後遷浦城會文丞相開府劔  
州大舉勤王之師遂傾家貲率鄉兵數百赴難  
及丞相被執無所歸匿于民間徒勾越以畢所  
志云茲歲冬予于雲塘族祖處得是集而讀之  
其詞多竒崛激烈之氣而麥秀黍離之感溢于  
言表如猛獸失羣悲鳴長哮于深谷風號四震  
聞者神悽心愴噫先生之身窮矣究其中信義  
素定或者丞相之不北行其事未可知也卒之  
憤世長往直欲起古人而與歸雖生者不死死

者復生是心可以質之而無愧矣要之天地間  
天理民彝實賴斯人以不泯是集不可不傳也  
予慨世變滄桑鄉之文獻凋敝是集多未及識  
謹依蠹本分卷重訂以寄景慕之意仍取古今  
論述先生之事者附諸末嘉靖戊戌春繆一鳳  
撰

晞髮集序

晞髮集者宋謝臯羽所著其名晞髮者何蓋祖  
楚騷沐咸池晞髮之義也夫臯羽負倜儻大節



傾貲赴難忠憤義烈曾未少展是宜暗鳴叱咤  
樂當血戰以洩餘忿乃黯然去都越國拉友放  
歌希意咸池翩然有欲仙之氣何耶嗟夫嗟夫  
予于勝國之事蓋難言哉嘗鏡徃袞見吳楚之  
在春秋人雖夷而地則固中國之區也俗雖夷  
而言則不待譯而知也而脩春秋者嚴一字于  
斧鉞惟夷夏之防爲兢兢彼蒙古何人非腥膻  
其域侏儣其語爲三代所薄伐而秦漢所爲空  
漠南之庭者乎奚帝擯而不錄如春秋之于吳

楚哉乃偃然墟宋之社纍宋之臣南面而爲天  
下主臯羽丁茲時憤懣激烈旣不能繫鍵鞭弭  
以一木支大厦又未嘗折圭僮爵以致命于封  
疆其計畫無所之乃隱身遁跡託興幽人而與  
二三同志締膠漆然諾交以夷猶甌山越水間  
遇竒勝必遊遊必味其忠義蘊蓄忱邑任僚無  
所杼洩而一于詩歌乎發之觸物比類緩態促  
節或清而和或沉而雄史氏謂其詩直溯盛唐  
而上卓有風人意味文尤蘄拔峭勁撈用脩謂

其詩精緻竒峭雖李賀復生亦當心服未可例  
于宋視之蓋至于冬青樹引俠客吳歌竹如意  
擊石數韻西臺慟哭記諸篇砰磕磋研一字一  
淚令人讀而歛歔想見其遺恨于吞吳之不得  
自遂者志誠足悲矣夫屈氏孤忠見放猶然哀  
高丘而戀湘瀨以臯羽視屈氏何如哉大物既  
改枯腸九迴人非楚而懷則楚詞非楚而吉則  
楚其儼騷命集也與湘臣作騷之意同一踟躕  
牢愁不得已而欲游心于物外而要之臯羽所

值則冠屨倒置天地易位其事有甚于楚矣故  
予于勝國之事蓋難言之也臯羽不云乎今人  
不有知予心後之人必有知予者夫以臯羽之  
直節素志卽無斯集已足雄視千古而與文文  
山謝疊山輩竝傳不朽而矧所撰著彪炳卓越  
又皆程于法而衡于古如方鄧潛溪諸君子之  
所評騭乎信乎其可傳已先是予友丁陽繆君  
懼鄉國之文獻或湮滅而無述手加校訂未及  
梓而逝至今丙申歲其嗣邦珏始募工付剞劂

以成父志蓋皆重民彝而尚友古人有足嘉者  
予與繆氏有世誼而又雅慕臯羽之爲人因次  
其語而弁諸首以寓景行之意云萬曆丙申福  
寧游朴撰

晞髮集序

謝臯羽予里樟南坂人實予族遠祖宋秘書省  
正字仲山公諱烈者外甥也其節義文章炳朗  
諸名公傳誌間無容贅矣第其遷徙靡一或書  
爲建寧人或有延平人間有爲長溪人者而又

畧其里居也以故先君得于遺集于蠹蝕之餘  
爲之彙錄成帙彼時宦遊歸老未及付之剞劂  
丙申夏予謁大叅游少澗公因詢予里中今昔  
人物予時對以臯羽始末而大叅公雅有闡幽  
之意命刻以傳而以首序自任云予惟古先賢  
哲足爲後生典刑者雖片言隻字天下後世爭  
相傳誦况臯羽爲吾里哲人而節義文章如此  
又况爲吾先君惓惓所欲爲表揚之而未遑也  
耶故承大叅公命遂忻然梓之并錄諸名公鉅

筆附之于右時萬曆戊戌季春穆溪繆邦珏撰

重刻謝臯羽集序

吳越有二塚其一伯鸞鄰要離其一謝臯羽揖  
嚴釣臺故人臯伯通方吳所劍許者事頗相類  
然吾謂光鴻一派也文丞相死于宋而臯羽慟  
哭死于文丞相豈直爲知己殉哉鼎足光鴻之  
間無愧若要離所殉者弒君而斬其君之嗣者  
耳罪亞專諸而俠醜聶政政猶念母離乃燔子  
不曰子親之枝乎太史公不立傳安言烈士然

則二塚者梁當奴使要離而嚴當弟友臯羽此  
定論也臯羽雖顛沛流離而著作甚富宋景濂  
稱其詩逼盛唐文蘄拔峭勁雷電出入風雨中  
晞髮集特一斑耳懷仁扶義子陵十四字不爲  
少伯鸞臯羽著書不爲多嚴梁有子孫不爲多  
謝無子不爲獨今往來桐江而不知臯羽則已  
試讀晞髮集訪堊處而不歛歔以拜者誰哉臯  
羽自署粵人表墓亦如之豈以漢書稱兩粵乎  
若稽班志則浙之富春閩之冶又吳分而非粵

矣故余刻斯集僭更曰宋閩謝翱著宋君也閩親也翱不忘宋豈忘閩若是則燔妻子以殉弒奪之烈士臯羽尚未肯奴之矣萬曆戊午臘月庚午晉江李叔元書于挹吳署

### 臯羽集序

文生于情悲歌痛哭情之至者也宋祚畢于犬羊腥風滿世彼一時也山水雲嵐木石無情之屬無不華損精銷陰黯如咽而况懷忠抱憤者乎謝臯羽以遺宋男子徘徊故宮舊國之間求

所以收合殘黎吹起餘燼者四顧無我偕事之人已矣廬陵悠悠我心且歌且哭神傷以死悲夫臯羽之情也獨知己也乎哉臯羽慟深于國恨靈均憂結于主昏千載同悲情有獨至故耳子陵隱者非臯羽所慕意者慕其遭耶夫陵于漢羽于宋一而已矣漢亡而陵隱故人舉義未相從也天下定而拜官人耕之人炊之已食之乎陵有人成就孤高羽無人發舒孤憤茲其所以浮瀨登臺楚歌放哭竹石俱碎也除兇雪耻

之死未酬埋骨白雲源與釣磯分岸庶幾後死  
照見此心猶冀一當以瞑身後之日無爾寂寂  
謂宋無人為隔江之叟所笑是則臯羽之情也  
先生建人卒杭塋睦建余鄉杭睦余治所也余  
嚮者未知有先生乃今始得其集乃今始識其  
墳宇宙之大忠賢之衆姓名可與日月爭光而  
埋沒烟草者可勝記哉咨嗟徃哲不能不深有  
感于斯文萬曆己未春日松溪真憲時序

晞髮集目錄

卷一樂府

宋饒歌鼓吹曲

日離海

天馬黃

征黎

上臨墉

軍澧南

鄰之震

象之奔

征誓

版圖歸

附庸畢

上之回



宋騎吹曲

親征曲

回鑾曲 三首

遣將曲 二首

歸朝曲 二首

諭歸朝曲

李侍中妾歌

孟蜀夫人詞

南唐奉使曲

伎女洗藍曲

邸吏謁故主曲

續琴操哀江南 四首

卷二五言古體

避暑池上

擬古 二首

九日前子善來會山中

九日集葆山寺得載字

九日禺中登沃洲放鶴峰南望天台諸山

五日山中 寄題山陰徐氏林亭

二首 寄所知

九日黎明發新昌望天姥峰

五日觀瀟湘圖 玉麈尾

鐵如意 遠遊篇寄府教景熙

峩眉老人別子歌 落梅詞

子夜吳歌

結客行

謝子靜寄端午藥煎

因北遊者寄峩眉家先生先生曾宰建之

浦城故末章及之 二首

寄東白許元發

秋暑飲僧舍分韻得

界字

擬古寄何大卿 六首

巖居效賈島

萍間稗荷效王司馬

體

效孟郊體 七首

雪中方四隱君訪宿有詩憶鹿田風雨舊

遊奉和併呈吳六贊府

九日

送殘暑

寄題何氏綠綺樓

夏日遊玉几山中

雨飲玲瓏巖下

翠鑲亭避雨

過舒臨海故宅

鍊蛇嶺長耳僧

聽雨

池上萍

觀水

十日菊

董孝子墓

萬松道中望南太白

僧舍避雨分韻得入字



卷三七言古體上

芳草怨

春江曲

烏栖曲擬張司業

廢居行

古釵嘆

雙桐生空井

飛來雙白鶴

山中曲擬張司業

短歌行

秋日擬塞上曲

瓊花引

咄咄復咄咄

桂花引

賦得建業水

賦得北府酒

楚女謠

後瓊花引

邳州哭

秋風海上曲

明河篇

射鳩行

虞美人草詞

劉寄奴草詞

白紵歌

陌上桑

折楊柳

廢瑟詞

飛仙引游沃州水簾

谷作

樊夫人上昇詞

鄴女墓

玉井水

鴻門讌

古別離

花卿冢行

和靖墓

蓮葉舟

望蓬萊

卷四七言古體下

冬青樹引別玉潛

贈寫照唐子良

種葵蒲萄下

送人歸烏傷

覓紫芝

雨後海棠

登廣靈寺塔望南高峰

閱方史君登行狀

雪度

食薺歌送別方安道

夜宿南明縣齋

書畫梅花水仙卷

小元祐歌寄劉君鼎

句章見月食

避暑城西觀吳道子

畫老君像

趙安夫北遊求詩安

夫韶王孫作詩送之

逃暑崇法寺

寶幢山尋黃提刑震

舊避地處

城西廢園

故園秋日曲

有洗舊誥綾作青色

鬻將以為綠以緝繒易得之作手卷賦

小樂章求好事書其後

廣惜往日

伏飛廟迎神引

送袁大初歸剡原袁來杭宿傳法寺寺在

德壽宮北今行路及園即宮舊址

雜言送鄭主簿炎之官昌化

懷鄧牧

卷五五言近體

感舊

二首

雨中感懷

桐華

寒食同方行父明中

往淶渚舟中作寄東安方子仁

答烟蘿隱者

送人還蜀

憶梁禮部椅

拜玄英先生畫像

哭正節徐先生

送汪十

槿樹

悼南上人

元日讀老子望瀑作

雨中觀海棠

哭所知

二月十日

九日韶卿子善有約

不至子靜亦歸桐廬與景雲飲瀑下

呈王尚書應麟

山陰道中呈鄭正樸

翁

送毛耳翁之湘南

寒食姑蘇道中

別子靜却送之雪

秋日憶過秦國公主園

送道士歸赤松

送僧之天台

雪水

用韻酌友人憶寄

鼓子花

哭宥齋李先生芾

八詠樓

至日憶山中客

懷峩眉家先生

哭廣信謝公

雨夜呈韶卿

莫春感興

山寺送翁景芳歸觀

寄朱仁中

遊釣臺

西臺哭所思

江上別友

題翁徵君集後

除夜聞雷

元日枕流亭聽雨

春日寄書代鄉人答

人日雪

早春寄嶺海流人

過孫文君舊避地處

春日遲子芳遊烏龍山

春和毛益亂後經太白墳

憶過徐偃王祠下作

山驛送春

蜂

僧池青蛙

夜宿江山寺

雪楊瀑布

虎石

寺南小池

夏夜山房會賦得竹

禽

芭蕉雨

中秋龍井翫月

夜坐呈韶卿

韶卿往烏傷寄劉元益

寄贈王兪判龍澤新之官廣陵

十日菊寄所思

巳丑除夜

元日立春

寄育王賢上人

海亭夜坐

魯國圖詩

智者寺

卷六五言排律

雨宿太白

中秋憶山中人

仙華山招隱

野霞觀瀑

採藥候潮山

夜宿雪竇上方

卷七七言絕句

島上曲 二首

俠客吳歌

小華陽亭

過臨安故宮 四首

雨中怨

卷八文

遊仙華巖麓記

自巖麓尋泉至三石

洞記

月泉遊記

粵某山蜂分日記

樂閒山房記

小爐峰三瀑記

遊赤松觀羊石記

金華洞人物古蹟記

鹿田聽雨記

遊石洞聯句夜坐記

睦州詩派序

登西臺慟哭記

卷九附錄

謝君臯羽行狀

方鳳

謝臯父傳

鄧牧

謝處士傳

任士林

謝翱傳

胡翰

謝翱傳

宋濂

謝君臯羽壙誌

吳謙

宋謝臯羽墓碑記

鄧椿

宋謝臯羽墓碑記

李紹賢

卷十附錄

宋遺民錄序

程敏政

跋西臺慟哭記

王禕

宋饒歌騎吹曲序

吳萊

丹鉛總錄

楊慎

麓堂詩話

李東陽

榕陰新檢

徐爌

福寧州志

游朴

浙江通志

薛應旂

宋學士集

宋濂

東越文苑

陳鳴鶴

詩藪

胡應麟

福寧州新志

殷之輅

忠義錄

王冀

風雅叢談

王應山

建寧府志

楊 垚

錢唐縣志

聶心湯

福安學志

吳仕訓

唐珏傳

張孟兼

金華縣志

胡 頌

西湖游覽志

田汝成

嚴州府志

徐 楚

白雲圖序

徐尊生

金華洞天游錄

錢 奎

吳善夫哀辭後

黃 潛

方先生集序

黃 潛

送吳良貴序

黃 潛

金華府志

周宗智

謝翱冬青引識

彭 瑋

浦城縣志

黎民範

遂昌雜錄

鄭元祐

稭死卮言

王世貞

五岳游草

王士性



客窓隨筆

趙世顯

杭州府志

陳善

跋西臺慟哭記

張蔚然

西園詩塵

張蔚然

祭謝臯羽文

董應舉

高賢傳

徐燧

謝臯羽攷證

徐燧

西臺慟哭詩

高啓

過謝臯羽墓

黃潛

讀西臺慟哭記

何喬新

釣臺尋謝臯羽墓

繆一鳳

過謝臯羽墓

劉元士

過謝臯羽葬處

董應舉

讀謝臯羽集二首

崔世召

弔謝臯羽七言古詩

郭鳴琳

晞髮集卷之一

宋長溪謝翱著

明邑令張蔚然

郡人徐燠訂

邑人郭鳴琳校

樂府

宋饒歌鼓吹曲

太祖嘗微時歌日出其後卒平僭亂證於日  
為日離海第一

日離海青瞳矐沃以積水涵蒼穹神光隱豹霧  
空氣呼吸爲蛇龍赤雲衣紫霓從吹白衆宿歌  
大風天吳遁清海宮

樂右日離海十四句句十二句句三字二句句  
四字

宋旣受天命爲下所推戴懲五季亂誓將整  
師秋毫無所犯爲天馬黃第二

天馬黃產異方龍爲馬白照夜氣汗雲聲奪野  
備法衣引宸駕騰天垠倏變化閨之餘劇以霸

閱八姓瞬代謝驅祥靈入罟獲皇上帝監於下  
誓無譁出旣禡市日中不易賈坐明堂朝諸夏  
賚萬方錫純嘏

右天馬黃二十六句句三字

宋旣有天下李筠懷不軌據壺關以叛王師  
討平之爲征黎第三

黎之埜彌蒼莽迤壺關屬上黨有雄矯健日餘  
宿將于故之思泣示厥像倚孽狐勢方張辨臣  
獻議勸下太行

太行依吳棫讀  
如輩行之行

趨懷孟虎牢計

之上爭洛邑以東鄉王師奄至扼其吭帝授方  
畧中厥狀獸窮駭突死卒以煬脅從已逮孥肆  
放凱歌回皇威暢

右征黎二十六句句十四句句三十一句  
句四字一句句五字

上親征李重進至廣陵臨其城拔之爲上臨

### 墉第四

上臨墉戈燿日韎韐指顧流電疾臯止其魁不  
及卒其魁則頑曰予號日出坐于轅門斧以率

歸子往諭泣股栗語中其肝至畢述待不及屏  
沮回遁鞠投于燎其所卽皇仁閱下焉如止蹕  
貔貅徹竈歸數實獲其棘矢納世室

右上臨墉二十四句句十二句句三字十一  
句句四字一句句五字

湖湘亂命將拯之至江陵周保權已平賊出  
軍澧南以拒卒取滅亡爲軍澧南第五

軍澧南潰飛鳥鷹隼北來龍蛇夭矯帝有初命  
奉致討臨於荆妖孽旣掃胡驅而孕雉入蒼莽

以保王旅長驅颯振槁以仁易暴戒擊剽惟荆  
衡及郴士如林磔其節蠹春葩秋陰我有造于  
南尼心切式敷德音

右軍澧南二十句句三字九句句四字四  
句句五字

王師拯湖湘道渚宮高繼冲懼出迎悉以其  
版籍來上爲隣之震第六

隣之震震于戶戒登陴徹守御神威掩至不及  
拒泐楚以南菁茅宿莽獻于王吏奉厥土天子

有詔侯西楚自南北東皆我疆龍旗虎節拜降  
王秦戈鞏甲期韜藏冕旒當中垂衣裳

右隣之震二十句句十一句句三字九句句  
四字

蜀主昶懼陰結太原獲其謀六師征之昶至  
以母託上許歸母數日昶卒母以酒酹地因  
不食亦卒爲母思悲第七

母思悲母于歸母聞帝語妾歸無所妾生并土  
蜀埜芒芒奄失其疆初帝謂母子昶來小者侯

大者王有瘼其肌載粟于創畢有下土方歸母  
于鄉天不汝奪朕言不忘

右母思悲十六句句五句句三句句十句句四  
字一句句五字

劉鋹亂嶺南為象陳以拒王師象奔蹠反踐  
俘鋹以獻為象之奔第八

象之奔斯惟迹蹶蹶魚麗駕空雲鳥潰南草浮  
浮順於貌貅焚其帑實棄厥陬皇風播播協畢  
后反

平聲霧星辰起皆北走唐季以來逆雛來味嶺

南肅清無留後于汴獻囚凱歌奏走音  
奏

右象之奔十八句句八句句三句句十句句四  
字

上命將平南唐誓城陷毋得輒戮一人眾咸  
聽命為征誓第九

帝命將臣誓師出征伯同馮牙于庭曰無劉我人

曲阿惟唐以及豫章孽于南國楚粵是疆我師  
孔武聿禽其王始怒額額將臣不懾曰如上命  
即起予疾弓韜于衣刃以不血收其石程焚其

侈淫視于丁寧苦羽不飲平聲收其鑄磬平聲以獻  
于京于廟告成垓塹既平

右征誓二十四句句二十三句句四字一句  
句五字

錢氏奄有吳越朝會貢獻不絕於道至是以  
版圖歸職方爲版圖歸第十

版圖歸歸職方昔服跗注備戎行帝錫之旆龍  
鳥章酌獻命與胥今上及秦王外臣拜稽首笑  
頷帝色康畢同軌來於梁畢靈奕奕敷重光願

止劔履覲帝裳四海臣妾配虞唐

右版圖歸十八句句九句句三字五句句四  
字四句句五字

陳洪進初隸南唐崎嶇得達于天子至是籍  
其國封畧來獻爲附庸畢第十一

清源無諸邦力弱臣秣陵聞道遣進表九門望  
日旌願齒鄒與郟自達天子庭四鄰彫霸業國  
除洗天兵皇靈暢遐外蜚俗邇聲明歸其所隸  
州乞身奉朝請青叶帝命得陪祀湯沐在王城從

茲附庸畢歌以頌河清

右附庸畢十六句句五字

太祖征河東班師以伐功遺太宗卒成其志  
爲上之回第十二

上之回舞干戚鳴鸞在鑣士飽力桴鼓轟騰罕  
山北餘刃恢恢軍容肅穆王畿主辰參後服神  
繼聖伐功卒扼以偏師斷北狄矢敢鳴房蝟集  
的質子援絕親銜璧并俗嘖嘖附于化以安得  
其屈產歸帝閑四夷君長來稱藩籥節夷樂示

子孫

右上之回二十六句句十三句句三字十二

句句四字一句句五字

宋騎吹曲

親征曲第一

雲屯列竈驅貔貅殿前殺馬祭蚩尤勾陳蒼蒼  
太白濕賊帳夢驚繞營日軍呼萬歲摧太行驂  
騮東抹流電光重華繼堯坐垂拱并土再駕無  
葛疆



回鑾曲第二

建隆親征回鑾二之一

徂暑黎陽車駕歸掃清氛翳兵更衣江都朔雲  
車駕出凱歌消水供尚食都人引領望翠華征  
人一月俱還家

開寶親征回鑾二之二

長堤夜幸士素飽孤城沈竈無飛鳥從征鹵簿  
拜上恩太常朝上回鑾表

太平興國回鑾二之三

都人望氣歸瑤闕星掃葦頭落參伐西人冉冉  
留紫雲六飛擁日歌回軍

遣將曲第三

平荆湖遣將三之一

天門雷動開風雲內前盡給羽林軍聖人神武  
授方畧斬將塞旗各駿奔王師所過如時雨洗  
濯焦枯嚮荆楚重宣德意吊遺黎素服軍前釋  
俘虜全家到闕拜上恩詔書爲築先臣墓

下劔門遣將三之二

神風流霆驅偃草天兵夜下西南道虎賁長戟  
來鳳州歸峽啣枚疾如掃廟謨萬里諭諸將山  
川曲折圖形狀天同鬼授契若符坐減罟罟虜  
供帳歸來論功授節鎮饒鼓殿前歌破陣

歸朝曲第四

南平王歸朝四之一

荆南萬里朝天道巫女雲荒產芳草錦韉道賜  
帶盤鵑方物南來進龍腦願陪郊祀依日光供  
帳歸朝親奉表勲階邑食及隸人移鎮徐戎作

家廟人生富貴侯與王四海爲家皆故鄉

吳越王妃歸朝四之二

勾吳月令牽牛中

妃以開寶九年三月隨王入朝

翟茀乘風來

闕宮隨王劔履朝上殿黃門夜趣長春宴昭容  
引班入內朝龍袞當中開雉扇宴罷朝辭生局  
促詔賜離宮作湯沐先王蒸嘗澤有差上恩許  
歌陌上花

諭歸朝曲第五

淮南草濕網蟲露家在先朝父尚主真人御極

四海歸偃蹇不朝稱節度夜持鐵券爲爾賜上  
恩特遣儀鑾使神離魄奪取族夷功臣効命錫  
龍旂

李侍中妾歌第六

李筠愛將惟儋珪美人姓劉筠侍兒城危搶撥  
不得力雨損鉛華帳下啼擁髻前言馬有幾猶  
說閨中那問此赤龍從東乘日車大繞城門內  
蛇死英雄際會風雲奔嬖人思報羅裳恩

孟蜀李夫人詞第七

春荒曲薄蠶叢土屈狄歸朝辭廟主官家呼母  
恩許歸劍閣并門無處所一作淚如雨故衣升屋棺  
四繞出門哭子汴州道回腸酹酒三致辭巴蜀  
如歸化啼鳥老身不食追爾魂鹵簿臨門拜上  
恩

南唐奉使曲第八

孤城圍中拜右史侍書猶對重瞳子請行慷慨  
期緩師奉命日馳三百里河流遡風車北首便  
殿蒙恩引天袖臣肝有血不濺衣寸舌欲存建

王後竒胸如江湧崔嵬慟哭不得天顏面

伎女洗藍曲第九

後庭朱黃作衣裏伎女帳帷青曳地碧綠夜掛  
寒不收綠此洗藍溽露水外間學染因得名不  
省歸朝爲國氏他年寄生產鴟尾空憶宮中鳥  
啣子

邨吏謁故主曲第十

嶺南使鶴日教戰巫女才人譖相見南撓欲載  
遠遊寇衛士盜船去不還夢見隨停上江邨道

謁淒涼惟故吏自言置邨本先王方物入朝緣  
此至聞言含咽涕灑江况乃園人舊姓龐淚辭  
嶺海無歸處蒙思祇向江陵住

續琴操哀江南

宋季有以善鼓琴見上者出入宮掖間汪姓  
忘其名臨安不守太后嬪御北汪從之宿留  
薊門數年而文丞相被執在獄汪上謁且勉  
丞相必以忠孝白天下予將歸死江南及歸  
舊宮人會者十八人醺酒城隅與之別援琴

鼓再行淚雨下悲不自勝後竟不知所在嘻  
汪蓋死矣客有感之者爲續琴操曰哀江南  
凡四章

我赴薊門四之一

我赴薊門我心何苦我本南人我行北土眎彼  
翼軫客星光光自陪輦轂久涉戎行靡歲不戰  
何兵不潰偷生有感就死無罪莽莽黃沙依依  
翠華我皇何在忍恤我家

瞻彼江漢四之二

瞻彼江漢截淮及楚起兵海隈亡命無所枕戈  
待旦憤不顧身我眎王室誰非國人噫嘻昊天  
使汝縲紲姦黨心寒健兒膽裂黃河萬里冰雪  
峩峩爾死得死我生謂何

我操南音四之三

我操南音爰酌我酒風摧我裳冰裂我手薄送  
于野曷云同歸自貽伊阻不得奮飛持此盈觴  
化爲別淚昔也姬姜今焉憔悴山高水遠無相  
見時各保玉體將死爲期

興言自古四之四

興言自古使我速老麋鹿是遊姑蘇荒草起秣  
我馬裴面舊鄉江山不改風景忘亡誰觸塵埃  
不見日月梨園雲散羽林鳥沒吞聲躑躅悲風  
四來爾非遺民何獨不哀

右續琴操哀江南者四章章四解或傳粵謝  
翺作讀其辭甚悲因其辭以推其心則其所  
悲又有甚於此辭者謂非翺作不可也當宋  
季年大兵壓境兩宮且以琴酒自娛故老言  
度宗在宮常以壺觴自隨盡日不醉權臣弄  
國江上之師不暇一戰反以捷聞蓋必有壅  
塞其耳目日蠱惑其心志而然與否則慄慄危  
懼之不卹而又何樂于酒藉令長江天塹北

軍不能飛渡安能坐守江南數郡為一龜茲  
國哉梁蕭繹時江陵戒嚴百官戎服聽講老  
子既輟講諫者言魏軍不出四境帖然又復  
開講一日以至力屈就擒身困縵幙雖拔刀  
斫案不得悔嘻宋季然矣夫人者乃能以善  
鼓琴見上吾意其不為鄒忌必為雍門周縱  
不能一悟主聽使之必有更張亦能使之泣  
若破國亡邑至聞疾風飛鳥之聲窮窮焉固  
無樂已及大事已去獨其心怏怏奔走萬里  
若不釋然者嘻亦晚矣天寶盛時歌者李龜  
年恩遇無比祿山亂龜年流落江南每歌數  
闋四座莫不嘆息泣下又况天地黯然山河  
頓異使夫人者尚在庸不有泣龜年者泣之  
乎子謂琴操多出于憂愁窮苦之人而有所  
守者翺之于辭適契焉故錄之若曰南風不  
競則自古見之矣尚何言哉尚何言哉金華  
吳萊識

勅按宋遺民錄云汪大有字元量錢唐人為

人感慨有氣節嘗以善琴受知紹陵宋亡從  
 三宮北去留燕甚久時故宮人王清惠張瓊  
 英皆善詩相見輒涕泣倡和語極悲壯或至  
 文文山狼狽所作狗幽十操文山倚歌和之  
 元主聞其名召入鼓琴一再行乞為黃冠歸  
 錢唐與故宮十八人醢酒城隅哀音哽亂淚  
 下如雨既歸往來匡廬彭蠡間若飄風行雲  
 莫能測其去留之跡自號水雲子有水雲集  
 自奉使出疆三吳去國所歷皇王帝霸故都  
 遺蹟可喜可詫可驚可痛哭者皆收拾於詩  
 劉辰翁馬廷鸞日曰詩史

晞髮集卷之一終

晞髮集卷之二

宋 長溪謝 翱著

明 邑令張蔚然

郡人徐 燠 訂

邑人郭鳴琳校

五言古體

避暑池上

遊子渺天末晨光東南馳良時不易晤胡為徒  
 來茲叢柏結夏塔輕蒲生夕颺空有齊紈扇團

團手中持持此欲永久但感顏髮衰愛爾雲中  
鳥浴彼道上池餘翎委弱藻飛去猶淪漪極目  
送不返將以窮所思

擬古二首

翔鱗化海鳧不化腦中石人生棄井邑寄處終  
爲客常懷墳墓思永夜良跼踖秋風吹蓬顆累  
累如布奕上爲考與曾下爲叔與伯豈無故鬼  
悲翻念遠行役服藥得神仙去後惟留迹忽夢  
南遊雲相逐孤飛翮

嶠南毒草花離離北潭址洗花潭洞中水黑魚  
盡起豈無建溪芽投之以方匕南山有雨來百  
毒化爲水臨流招故人洗髮弄清泚

九日前子善來會山中

朝尋寒露枝暮摘不盈把風吹西南雲幽情誰  
與寫有客來縉州遺我古盞箏中有鴛鴦文色  
如銅雀瓦浮以鬱金鞋苔蘚藉其下此物寧足  
感聊用助歌者但懷郢曲悲豈計所知寡

九日集葆山寺得載字



明髮集 卷之二  
貧居懶出門未到輒復悔偶尋秋夕英顧見石  
璀璨手斲松根苓下有墳千載青山如葆羽無  
人禁樵採狂歌呼麴生悲往與故在未卜遇浮  
丘猶堪居畏壘

九日禺中登沃洲放鶴峰南望天台諸山  
鏡面小蓬島入剡脫我驂舍權來沃洲下嶺見  
精藍脩眉浮天姥天台在其南良遊愛九日中  
墮髮不櫛醉浮秋夕英饑食決明食遠尋竺僧  
迹俛仰千載陳狂呼許元度王謝十八人彷彿

川谷應草木皆冥冥便欲卽之語又疑物所馮  
閉目遊秦初寥廓以爲隣

五日山中

東隣拔蒲根南隣燒艾葉艾葉出青烟蒲根香  
勝雪乾坤生燐火陰碧期月光烟隨艾葉散進  
此菖蒲觴蒲觴益齒髮齒白髮如漆飲餘不盡  
棄置之五七日五日化爲丹七日化爲碧一服  
一千年令人生羽翼

寄題山陰徐氏林亭二首

見南亭

青林見危構南山覆其陞林居何爲此爲愛烟  
霧姿上有鷓鴣鳥來從溟海湄飛止不他鄉畏  
與宿願違違此頃刻間萬死莫贖之而憂中夜  
露辛苦濕毛衣毛衣豈願濕卽濕非所辭莓苔  
與蕙苾以含弄寄相思

山陰茅宇

山陰久淒涼復爾見茅宇客來愛其人問此於  
誰語自云邇先塋玩構亦廬處朝光凌爽氣初  
巖巨脩渚平居狷介心祇以自爲苦日夕驅其  
奴名之同所惡驅汝汝不辭我懷良可悲

寄所知

何處識君面青天雲霧裾携琴上衡霍玄髮向  
風梳別去看流水三年此躊躇偶同海鳥夢爲  
致空中書

九日黎明發新昌望天姥峰

南明剡東山鸕菽草與萊前岡接遠阜樹石如  
莓苔西南見天姥旭旭雲日開下有采藥徑仙

人招我來手持白菊花泛以青螺杯傾杯化靈  
藥麝芳入客懷俛視浮爨居白氣爲塵埃涼風  
吹脫巾一往不願回便投此策竹騎龍下天台

五日觀瀟湘圖

五日泣江離騷人沉佩襟年深吊古客滿門垂  
艾葉旣垂青艾葉復競畫舟楫明時內閣子供  
奉進瑤帟豈復懷沅湘歷舜愬往牒江流物色  
改看畫淚承睫彷彿舊居人指點失故業三戶  
空鳥啼九疑列如堞

玉麈尾

客持麈尾柄色奪環與玦塵心隨影祛一片若  
行雪神獸潛空山何年探靈穴忽失落人手遂  
爲談者悅陰厓起白氣篆古踰軒頡一拂沉蘚  
文再拂字不滅三拂蛟螭騰世眼不能別投爾  
陰厓巔驚怪吐其舌

鐵如意

仙客五六月月下鬪婆娑散影若雲霧遺音杳  
江河其一起楚舞一起作楚歌雙執鐵如意擊

碎珊瑚柯一人奪視之睨者一人過更舞又一  
人相向屢傴僂一人獨撫掌身挂青薜蘿夜長  
天籟絕宛轉愁柰何

遠遊篇寄府教景熙

朝遊扶桑根不折拂日枝莫食楚萍實掬海見  
虹霓黃鵠別我影目盡漢水湄况復銜其子風  
露何當歸飄蕭軟桂叢零落紫苔衣夢魂知爾  
處落羽在瑤池

酬謝臯父見寄

林景熙

入山采芝薇豺虎據我丘入海尋蓬萊鯨鯢  
掀我舟山海兩有礙獨立凝遠愁美人渺天  
西瑤音寄青羽自言招客星寒川釣烟雨風  
雅一手提學子屨滿戶行行古臺上仰天哭  
所思餘哀散林木此意誰能知夜夢繞勾越  
落日冬青枝

峩眉老人別子歌

峩眉有老人奉命過嵩少天風吹西翼冉冉明  
夕照濕塵紛墮天髮白更待報有子爲異物不

得入家廟慟哭東南雲相望滄海嶠青鳥年年  
來寄書久不到

落梅詞

北風花糝枝春風花糝衣青鳥夢中見畏來花  
下飛豈是得春遲因緣別春早夜濕灞陵苔半  
在古馳道入瓦雪冥冥離樹香草草那無返魂  
術不忍見春老

子夜吳歌

玄髮照秋水茱萸香未歇風吹夜合花露濕衣

上月

結客行

結交衛京師棄家南斗陸相看各意氣欲取遼  
陽歸事左脫身去豈爲無所爲家藏楚王子手  
執五陵兒泣奉先主令白旗擲天揮鞭屍仇必  
報函首捷終馳力盡志不遂以死謝漸離

謝子靜寄端午藥煎

麩桃弄朝烟含蟲練百杵山人入藥籙搗日月  
逢午甘酸雜衆味能生玉池乳頗憶粵吟人性

靜無所苦中年白髮生寄以潤肺腑爲謝山中  
人願結山中侶

因北遊者寄我眉家先生先生曾宰建之

浦城故末章及之二首

靈關高縹緲縹緲出層城其上盤紫雲倏忽牛  
馬形交青不栖樹浴彼清冷泓惟有孤鸞鶯銜  
命此山靈迎風溯寥廓杳杳西北征羽毛中道  
拆六月霜霰零回首靈關雲淚下如懸纓

江淹所治縣粵王曾種樹山人雨後來空臺惟

宿莽故人出端平子孫今不武寥寥南峰寺枯  
禪尚靈雨猶記桐卿祠影前及僧語

寄東白許元發

昔我來南方采藥與君遇仙核墮寒蕪水花明  
遠渚雲空參語外露下離立處別來荒烟中五  
閱寒與暑寒暑豈異初肌髮不如故聞處人道  
變未得世病愈驅車望東白此情那可溯倘及  
乘青蜺爲君拂塵羽

秋暑飲僧舍分韻得界字

靜無所苦中年白髮生寄以潤肺腑爲謝山中  
人願結山中侶

因北遊者寄我眉家先生先生曾宰建之

浦城故末章及之二首

靈關高縹緲縹緲出層城其上盤紫雲倏忽牛  
馬形交青不栖樹浴彼清冷泓惟有孤鶯鶯銜  
命此山靈迎風溯寥廓杳杳西北征羽毛中道  
拆六月霜霰零回首靈關雲淚下如懸纓

江淹所治縣粵王山  
何山人雨後來空臺惟

宿莽故人出端平子孫今不武寥寥南峰寺枯  
禪尚靈雨猶記桐卿祠影前及僧語

寄東白許元發

昔我來南方采藥與君遇仙核墮寒蕪水花明  
遠渚雲空參語外露下離立處別來荒烟中五  
閱寒與暑寒暑豈異初肌髮不如故聞處人道  
變未得世病愈驅車望東白此情那可溯倘及  
乘青蜺爲君拂塵羽

秋暑飲僧舍分韻得界字

夜露搖井梧明河涵左界酣眠知何益筋力久  
已懈餘氛薄中餐幅巾無所挂欲去豈不能有  
與輒中敗浮醅濟瓜茗陰鼎漉薑芥忽醉此山  
中解衣如脫械涼颼掃地生塵暑焚香邁空巢  
見落毛石髮卷如蠶

擬古寄何大卿六首

空山產桐梓擬作膝上琴琴成不他飾種漆江  
之潯獨無徽將軫何以發商音但得獨繭蠶飼  
之扶桑陰烹魚腹有膠不患海水深

雄雌雙碧雞所食琪樹藹來棲藥洞中當春怕  
乳子其雌秋別時守此惟雄耳可憐銜子歸萬  
里渡海水

世傳賣藥翁出市恒騎虎竭來空山中恨不輒  
與語長嘯歸無家獨指梧桐樹旣指梧桐樹復  
采梧桐子持以贈所思浩歌聊復爾

石間道人影見者恒髮髯浮雲過列仙與語呼  
之出身亦竟不出影亦竟不沒含涕謝仙人天  
地此終畢



明髮集 卷之二  
流來山中花紺碧三百里漪漪歛硯雲含風入  
秋水五芝與八石徃徃產其沚豈獨秘靈文亦  
復隱竒士不見施家郎詩詞獨清泚一朝控白  
鸞吹笙洗塵滓

山人食木實竹實以飼鳳聞此來空烟三載脫  
塵鞿不見玉笙音惟聞溪鳥弄西臺憶故人野  
祭忽如夢仰視浮雲馳不覺哭之慟

巖居效賈島

巖巖百尺屋山鬼寂四壁獨抱震餘桐橫此風

中石夢見一道者手持青瓦礫謂此有至音世  
人不能識粟塵起嗟我滄海寄一滴語罷失其  
處覺來空嘆息攝衣起楚歌斷絃如裂帛懸藤  
月露深蛟龍舞其側

萍間穉荷效王司馬體

初萍半含絮頃刻開數畝荷生浮其間風雨足  
解后百年遊子心欲作千歲久昔爲浮萍根今  
爲穉荷藕荷高刺已生魚遊觸其首離離荷下  
萍吹向白魚口

效孟郊體七首

手持菖蒲葉洗根澗水湄雲生巖下石影落莓  
苔枝忽起逐雲影覆以身上衣菖蒲不相待逐  
水流下溪

移蓼窓北地經歲日不至悠悠荒郊雲背植足  
陰氣新雨養陳根乃復佐藥餌天涯葵藿心憐  
爾獨種藝

間庭生柏影荇藻交行路忽忽如有人起視不  
見處牽牛秋正中海白夜疑曙野風吹空巢波

濤在孤樹

落葉昔日雨地上僅可數今雨落葉處可數還  
在樹不愁繞樹飛愁有空枝垂天涯風雨心雜  
佩光陸離感此畢宇宙涕零無所之寒花飄夕  
暉美人啼秋衣不染根與髮良藥空爾爲  
越禽惜羽毛不向惡木棲木奴重踰淮愛爾巢  
其枝巢枝不食實中有二老棊乳子月明中夢  
繞東南飛

弱柏不受雪零亂蒼烟根尚餘粲粲珠點綴枝

卷之二  
葉繁小榻如僧床下有莓苔痕對此莓苔痕三  
年不敢言莓苔倘可食嚙雪待朝暾豈無柏樹  
子不食種在盆

閨中玻璃盆貯水看落月看月復看日日月從  
此出愛此日與月傾寓人妾懷疑此一掬水中  
涵濟與淮淚落水中影見妾頭上釵

雪中方四隱君訪宿有詩憶鹿田風雨舊

遊奉和併呈吳六贊府

金華入北山空響出靜竚鹿田在其巔肺石來

風雨有客六七人昔遊至其處惟我愁不眠起  
坐蹴君語謂此定何聲百感生離緒玩非琴與  
瑟復異砧與杵醉者呼不應愁者自爲苦空櫺  
怯孤衾展轉如巢樹濕歌散餘悲以足拊柱礎  
爾來又七年欲至困羈旅傳聞老桑門已復蟬  
蛻去入山惡少年巾鉢空其聚乃知人世間何  
者爲客主而我同懷人忽復異處所夢中遙相  
望各抱不售賈有客不同遊亦是同懷者地主  
况有期輿馬不待假倘規宿山中疇人不應舍

九日

秋風颯以至今日重陽日眼明對南山尚想陶  
彭澤向來建威幕頗見有此客驅車不小留駕  
言公田秫一朝又棄去此意誰能識寄奴趣殊  
禮風旨來自北只今王江州建國功第一故是  
何珉孫舉動良足惜飲愧望柴桑稍以自湔滌  
殷勤白衣餉猶恐不我卽中路候藍輿要致已  
甚迫葛巾赤兩腳頽然向林宅此翁本坦蕩焉  
能苦違物雖然可計取中實未易屈華軒又何

羨自載返蓬華終身書甲子徃徃義形色如使  
磷與緇安得爲玉雪籬邊菊弄黃粲粲正堪摘  
我方持空觴千載高風激

送殘暑

向已送殘春當茲送殘暑離尊雖不同時節會  
有去平生若汗塵欲避無處所驪駒出商音畏  
不將風雨却憶別花時紅塵挽衣屨回首漢諸  
陵落日無窮樹

寄題何氏綠綺樓

北岬有高樓其南多藥樹仙人晝采之遺佩鄉  
江渚化爲綠綺琴軫徽微已具有客來南方振  
衣坐其處風吹朱鳥巢欲落鳴至曙山分地肺  
雲水流天日雨別去重所思別時不能去

夏日遊玉几山中

曳舟來山中出郭稅吾駕獨慕忻衆勝晨發乃  
及夜豈無城中山愛此足幽野橫陳玉几峰隱  
護碧殿瓦并州古男子禮塔於此舍而我飲冰  
人猶爲內熱者擬携桃枝笙舒卷得餉暇明席

織海草因之一枕藉冷風吹雪空相與坐其下

雨飲玲瓏巖下

垂雲起欽欽衣被松與桂夜含星斗光隱若金  
石氣雨來輒阻之不得撫蒼翠下有桑門子飲  
用陶匏噐盆中蓄海石左顧如牡蠣疑此磧上  
來不知幾年歲桑門却問客所居何姓氏回指  
南海峰蒼茫倘一至

翠鑲亭避雨

亭有魏王妃所題字尚新王嘗以皇子成德

軍節度使鎮明故妃至其處

客有遊山衣著久如薜荔行行萬翠庭忽作風  
雨憇仰面無所覩梁間有題字問此何人書婉  
婉有弱氣云昔魏王妃學書似李衛乘雲到此  
山洒墨在空翠塵風吹土花倏忽景物異疑此  
夢與仙不類人間世

過舒臨海故宅

破壁濕海蘚水退日氣蒸云是舒公宅其孫艾  
且仁昔公初作尉視事卽斬人上書稱臣置待

罪滄海濱天子有詔至汝曹可治民爾時荆文  
公上方邑之鄞聞此輒異之久會公秉鈞謂此  
非狂狷引用至中丞立朝思蹇謬庶以報君親  
蘇公下詔獄讒者用事新於此與有力豈爲重  
其身晴風吹海雨山川尚橫陳俛仰忽太息徒  
爲驚爾隣

鍊蛇嶺長耳僧

嶺上有神僧風吹豎兩耳云昔垂至肩手提忽  
然起遊方得至術來此制蛇虺衣縫獨繭絲裂

明長集 卷之二  
縫蛇盡死至今山下草食之蠱可也客去勿復  
言海隅多幻詭

聽雨

山厨壓炊烟野雨起薄暮孤客卧空牀不識門  
前路回風已若休入壑忽如赴荒林啼鬼車往  
往不見處隣翁起厭勝况作禹餘步聽雨雜况  
聲起歌助其語况靜雨亦止還眠向窓曙

池上萍

浮萍隨漲水上到荷葉端水退不得下猶粘花

萼間花殷青已見葉翠枯始斑何如根在水根  
蒂相團團人生慕高遠風雲事躋攀絕髯尚號  
叫化爲鶴與猿幸未及枯槁萬里吾當還

觀水

積陰生壑雨野水學江流對屋見燈火相望南  
渡頭浮槎到高樹白龜起滄洲變恠若不測神  
功安能充稍退見涯涘及來痕抹收崩濤出白  
石隱隱如博投水楊洗荒根素髮生古愁見此  
倏若化故流還膠舟荒源不可詰欲盡山雲求

十日菊

今日非昨日尚覺秋英好明日異今日秋英詎  
云早所以惜芳人采擷常貴少而彼千載士憐  
爾獨皎皎晞霜敷朝榮零露抱夕槁千載且復  
然一夕寧恨老

董孝子墓

脩脩古孝子家移來水傍母病食此水母死葬  
其鄉殺人自白吏就家起爲郎至今廟下草猶  
帶食水香

萬松道中望南太白

筓輿行萬山中有十里亭老樹秣一色野公逾  
百齡柴關當太白藥氣近樵青岡草粘枯翼巢  
枝落退翎期探幽谷水共斲松根苓艾納下天  
雨塵風吹冥冥

僧舍避雨分韻得入字

故人隔天風海水吹不立聊將塵渴心遠赴山  
中汲晴香芝菌生暝翠霧露濕惟應雞犬深幽  
林聽經入



晞髮集卷之二終

晞髮集卷之三

宋 長溪謝 翱著

明 邑令張蔚然

郡人徐 勣 訂

邑人郭鳴琳校

七言古體上

芳草怨

湘雲離離沉曉月  
疏麻夏死白水發  
傳芭楚女辭帳中  
夜逐霓旌南過越  
荆岑越嶠殊百草  
恨

結柔絲香不老紅英搗鹽實斧創青子滿地枝  
如掃刺桐樹朽猩猩在佩雜芳蕤散秋海鄉來  
青鳳食花去瞻望靈均涕零雨

### 春江曲

妾身生長臨江邊幼嫁酒家學數錢自從夫壻  
去爲賈別妾初下武昌舡涪陽歸鴈不寄影雋  
州書到已三年別時夢指水爲誓惟有海鳧見  
妾淚愁拋錦字下中流卻見海鳧淚如水

### 烏栖曲擬張司業

吳宮草深四五月破楚門開烏啼歇美人軍裝  
多在舡歸來把弓墮弓弦越羅如粟越王獻宮  
中養蠶不作線轆轤出屋井水淺梔樹花萎子  
如繭烏栖烏啼宮燭秋越女入宮吳女愁

### 廢居行

海濤翻空秋草短白蛇入窠啗雀卵經年廢屋  
無居人孕婦夜向船中產歸來多雨臼生魚穴  
蟲祝子滿戶樞隣家買屋供官役買得沂王園  
令宅

古釵嘆

刑徒鬼火去飄忽息嬾堆前殯齊發白烟淚濕  
樵叟來拾得慈獻陵中髮青長七尺光照地髮  
下宛轉金釵二持歸薰沐置高堂包裹恐爲神  
所將妻兒朝拜復暮拜冉冉卧病不得瘥省知  
天物厭凡庸夜送白龍潭水中扣頭卻顧祈免  
死未入幽宮伴龍子

雙桐生空井

風飄白露井梧落葉上丸丸綴靈藥琴枝連理

鳳鳴晨轆轤雙轉銀銚索

飛來雙白鶴

飛來縹緲立在門嚼銜竹花意欲言雄雌來去  
眼如霧客已彷彿知其人笙簫忽遠不知處知  
在雲窓與綠戶

山中曲擬張司業

夕烟沉曙烟起野爨溼茫茫空竿弄塵水枿欄  
樹倚西南雲生葉團團如車輪桑弓蓬矢半刀  
筆去者送盡無來人捫蘿慟哭衫袖冷白首空

明身集 卷之三  
三  
圓掃山影

短歌行

秦淮沒日如沒鷲白波搖空溼弦月舟人倚櫂  
商聲發洞庭脫木如脫髮寒蛩哀啼衆芳歇晨  
梳青林望吳越吳歛越吟浪花舞秋槎溼劍歸  
無所愁生酒醒聞山雞石鏡飛花汗如雨起招  
如意擊樹枝爲君悲歌君淚垂

秋日擬塞上曲

落日燉煌北妖星太白西涼風吹沙磧帳下玉

人啼吹沙復吹草嘶馬未知道醉後聞塔鈴胡  
天忽如掃野駝尋水向月行露下胡兒食秋棗

瓊花引

后土祠前車馬道天人種花無瑤草英雲蕊珠  
欲上天夜半黃門催進表酒香浮春露泥泥二  
十四橋色如洗陰風吹雪月墜地幾人不得揚  
州死孤貞抱一不再識夜歸閨風曉無蹟蒼苔  
染根陰雨泣歲久遊魂化爲碧

希髮集 卷之三  
四  
咄咄復咄咄

咄咄復咄咄野風吹雲起草垓竹塵陰陰不見  
山雞飛上樹海沒鷓人間舊事新白頭淮南小  
兒未識愁淮南老翁叫無力瓦盆盛水看日食

桂花引

風生河漢吹鳴璫桂宮神斧伐遠揚西遊真人  
得竒曲九門不鎖天兩霜人間青烟溼塵鞅藥  
臼嵯峩壓天夢

賦得建業水

建業水秋風動揚子魚龍夜落星斗南潮沒潮

生蒼鶻起他年冠蓋物具美風吹小船入城市  
潮去不來風日死白波黃塵烟霧裡中有長魚  
食鱸鮓解后食魚何處是西上國門望武昌風  
雨徙魚來漢陽武昌魚勞聚寒慘太白入月魚  
腦減武昌城頭鼓統統

賦得北府酒

北府酒吹濕宮城柳柳枝着地春垂垂祗管人  
間新別離離情欲斷江水語女兒連臂歌白紵  
淮南神仙來酒坊甲馬獵獵羽林郎百年風物

烟塵蒼老兵對月猶舉觴青帘淚濕女墻下曾  
識行軍舊司馬

楚女謠

楚山蕭蕭吹緝髮楚女采蓮歌夜發年年種蒨  
遲成藕水深拔根絲在手懸房學繭秋雨多化  
爲魂夢巢蜂窠前花作實采已盡後花尚蘖船  
未過昨昔浮萍隨漲水溼紫寒青裹蓮蘂

後瓊花引

揚州城門夜塞雪揚州城中哭明月墮枝溼雲

故鬼語西來陰風無健鶻神娥愬空衆芳歇一  
夕蒼苔變華髮宮花窄簾塵掩襪玉華無因進  
吳越灘灘淮水山央央誰其死者李與姜

邳州哭

邳州哭井水竭去年哭毋瘴海熱今年此日來  
邳州母死未禫子爲囚邳州土濕淚長在化爲  
蒼苔色不改雨洗遊魂歸瘴海

秋風海上曲

秋風吹水龍上天龍女抱珠海底眠水花生雲

起如葑神龍下宿藕絲孔巨鼈頭鳳鼉鼓隨赤  
魚鱗鬣陳旂海人見此失操網歸對妻兒月  
下紡自言移家來磧中十載秋風潮不上老夫  
一人語門前見此已是開皇年

明河篇

牽牛夜入明河道淚滴相思作秋草  
婺女城頭翫月明星君冢上無啼鳥  
天寒露淨沾衣巾明河倏化爲白雲  
雲飛蜿蜿秋在水石壓槎頭海烟起

射鳩行

少年摻弩挾兩矢朝射青鳩暮射雉  
人言雉蛇所化欲食躊躇筋不下  
街頭得錢爭買鳩網林扶藪無時休  
老父勸見食且止燕安有毒况珍美  
爾不見鳩食半夏鳴爾屋爾毋食鳩  
有毒

虞美人草詞

鬪髀起語鴟叫嘯山精夜啼楚王廟  
渡淮風雨八千人叱咤向天成白道  
身經百戰轉危亡狼

籍悲歌出漢堡夜帳天寒抱玉泣血變草青烟  
曉溼他年避仇春草生吳中草死無妾名自從  
爲草生西楚得到吳中猶楚舞

劉寄奴草詞

榛中小草夏蔚蒼葉如牡艾花如毳少年防寒  
得命生出鏃肉中無粟起向來神姦見白晝溼  
竹烟青聞杵臼英雄奮臂徵此時唾落虛空散  
林藪漢家白蛇入本紀況是天王舊支子豈知  
苗裔在民伍蛇鬼猶呼帝小字

白紵歌

江頭蓬沓走吳女浣水爲花朝浣紵晝隨晴網  
曬日中夜覆井闌飄白露織成素雪裁稱身夫  
爲吳王戍柏舉田家歲績供布縷獨夜詎如妾  
愁苦

陌上桑

旭日瞳矓颺拂羽落甚空條生曉霧人生顏色  
逐春妍夏葉饑蠶少絲縷闌膏照蠶未登簇露  
溼頭梳惟水沐卻憐隣女學鍊真藥爐七過煮



桑新縱逢簫史上天去甕盆生苔愁殺人

折楊柳

月時折柳江頭別春去來看柳上月翠翎小鳥  
巢短枝巢老重重編散髮人生貧賤多別離巢  
中髮密妾髮稀人生富貴能幾時年年柳色青  
綠垂

廢瑟詞

發埋空山敗繒客草中惟棄秦時瑟樵夫拾置  
貽樂工朱徽作絃如墨色自從漢曲入饒歌清

廟無人傳不得至今崔嵬聲已死越底春虫聞  
呪子

飛仙引遊沃州水簾谷作

赤城後門桃花尾溼浸靡蕪洗蒼耳小支菩提  
海上來天風吹下谷簾水斜珠界左轉復右華  
蓋縣肝三葉紫內間肉芝承乳流鬼母仙姝臨  
洗胃蒼龜守關朝太微色阻讒臣誣奏事海桑  
男子在謫籍驅鹿行車閏年至

樊夫人上昇詞

四明山樊榭卽漢劉綱與夫人樊氏上昇處  
石罅粘窓秋見海山雞夜啼弄毛彩王孫吹笙  
導夫人青髮凌風素霞在兩塵離地白浩浩河  
西種星榆樹老海桑童童日出歸衣溼上池洗  
頭草

鄧女墓

網草新垂月中露青禽夜宿菱塘曙寺西幽脩  
雲覆土知塋舒王下殤女百年光塵事事新皇  
子夫人墓作隣民間厭勝祈新鬼穉鬼久隨風  
雨陳去來似爾勿復道白下鍾山夢中老

玉井水

玉華翳日神封井液冷秋根洗雲影年年天女  
下來觀露溼風吹太華頂永枝脫葉墜欲舞青  
鳥伺枝忽銜去夜深井氣白吐虹井中龍子如  
守宮凡人不敢飲此水往往夢寐遊其中

鴻門讌

火雲屬地汗流宇杯影龍蛇分漢楚楚人起舞  
本爲楚中有楚人爲漢舞鷓鴣淬光雌不語楚

國孤臣泣俘虜他年疽背怒發此砮礮雲歸作  
風雨君看楚舞如楚何楚舞未終聞楚歌

古別離

仙人別母母哭啼遺以神藥乃醉之醒來哭定  
記兒語食此庭前雙橘樹葉能禦饑病能愈豈  
似當時逐兒去隣翁有女立我前取刀剖腹爾  
勿憐但爾嫁夫能治田生子不願生神仙

花卿冢行

山谷云花卿冢在涪陵之東館鎮至今猶有

英氣血食其鄉

溼雲模糊埋秋空雨青沙白丹陵東莓苔陰陰  
草茸茸上聲云是花卿古來冢花卿舊事人所知  
花卿古冢知者誰精靈未歸白日西廟鴉啄肉  
枝上啼絲州柘黃魂正飛

和靖墓

山中處士白麻履死後無書獻天子青童玄鶴  
晝上天夜下玉棺塋湖水湖堤四合葑如髮芳  
樹玲瓏倚春雪百年鳳舞雲霧空玉碗人間出

勾越宮嵐塔雨恍如失飛網繞湖冠聚鷓琳宇  
焚芝秋寂歷斗下無人祠太乙

蓮葉舟

溼雲冉冉依芳芷楚女神絃迎帝子天人種蓮  
露染根一片碧花秋墮水笙簫聞聲影如夢浮  
花漠漠船來重神蛟蛻腸江水湄化爲五色光  
陸離中有玉人跨蛟舞藕根斷絲罥人衣碧瞳  
秋髮眠清夜按肌不粟清露下

望蓬萊

青枝啼鳥波延延方士指海談神仙五雲垂天  
光燭夜老父相傳說車駕千官此地佩宛宛舟  
發黃門止供頓繞樯赤日護龍旗西北驛書馳  
羽箭百年塵空滄海晚月落無人度灞澹雞鳴  
白石爛如銀蓬萊不見夷州遠

晞髮集卷之三終



皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

皇朝通志卷之三十一

